



眉公先生晚香堂小品卷之十七

雲間陳繼儒著

傳

忠烈張大司馬傳

張銓字宇衡。號見平。山西沁水人。父五典。卽海虹先生。按蘓松。風稜嶽嶽。稱名御史。歷官太僕卿。公生十月。李夫人挈之歸寧。夜半火發。臥下。李燼烟焰中。公無恙。二十一中鄉試。甲辰成進士。授保定推官。讞獄廉明。擢浙江道御史。出巡茶馬。丁內艱。服闋。又巡江



西。戊午建酋襲撫順。總兵張承胤戰歿。詔贈少保左都督。公奏曰。綱目書死之例有三。曰死之。曰戰死。曰敗沒。死之者。節之也。戰死者。功罪半也。敗沒則直以喪師辱國之罪。時論譴之。又上方畧言。經臣鎬。大將軍柏楨不可用。兵不可募。餉不可派。狡夷不可挑戰。以封疆博一擲。未幾三路覆師。公言言左驗。天啓元年。特命公按遼。監其軍。客曰。公資十年矣。俸六年矣。兩差之期報竣矣。又嘗上章請告矣。公不往。誰能

駢公迫公者。公嘆曰。遼左失陷。朝野震驚。士大夫不能爲。主上分憂。而乃私畜駿馬。預遣妻孥先去。以爲民望。何怪邊關將士望風鼠竄哉。其孤憤勃勃。填胸請脂車兼道而前矣。旣抵關。袁經畧先納降夷三千人。雜屯瀋陽。三月賊犯瀋。被陷。川浙兵戰死。胡騎充斥。居民空無人。公請撫臣帶河西之兵。移駐海州。督臣帶山海之兵。移駐廣寧。以救呼吸之危。以張應援之勢。疏墨未乾。而賊已薄遼陽城下矣。勸公者曰。公監軍與經畧異。巡方與守土異。跳而出圍。以圖後



舉可乎。公曰。我一腔熱血。欲洒此地久矣。賊至。我兵出戰。廣寧標兵二千。直犯賊鋒。賊少却。明日復圍城。公與諸大夫畫地爲堅守計。公守西門。登埤環塹者。三晝夜。親以火箭焚賊車。薄暮內應。城隅火燭天。公衣繡衷甲下城。從者擁出小南門。請易服。弗許。入署。叛賊李永芳。曉來伏謁。搏頰謝無狀。公曰。汝爲我言。我對誰言。嗟何及矣。賊取公去。永芳扶公竝轡行。且說降。公自投於地。面傷馬。公見賊。挺立于庭。左右抑之拜。公曰。我豈肯爲犬羊屈膝。戟手瞋目。

大詬罵。且有力擊人。輒披靡。賊怒。捽公出。復呼回。爲撫慰者再三。又擬刀脅公。公引頸以待。賊誘曰。縱汝歸。公曰。我以死爲歸耳。奴知不能奪。送之輿。却輿送之騎。却騎。仍令錮之。公署中。父老諸生泣而隨之。告永芳曰。幸護張使君。公厲聲曰。汝等好百姓。乃爲好漢子。索命賊手乎。衣冠向闕拜者八。向家拜者四。遙謝君父畢。遂自經。賊走視。嘆曰。忠臣忠臣。遣永芳斂而瘞之。建祠於北門外之演武場。流人鄭良弼。祖天弼。杜時隆。自遼歸。目擊其狀如此。撫按核確奏聞。



上悼憫卹錄。賜謚忠烈。賜廟額曰昭忠祠。省城又合祠于都城。賜祭三壇。賜衣冠葬三百金。廕長子道濟。世襲錦衣衛指揮僉事。初。贈公大理卿。再進兵部尚書。加三代如其官。從御史張慎言。李日宣。給事中尹同皋之請也。公狀貌魁梧。豐頤廣額。面頰美髭髯。兩目燿燿如閃電。初。李夫人孕時。夢神人裹黃金甲。被髮仗劍入內。及期誕公。公官司理時。又夢入兩是亭。楊中丞繼宗許忠節公達揖公而前曰。虛席以待久矣。至是遂符前讖云。往者遼報頗棘。海

虹先生速公啓行。星言夙駕。不三月遂及于難。得報先生曰。吾知兒預有今日久矣。子道濟以諸生長號徒跣將赴遼陽。訪求公之遺骸。而海虹先生泣止之。曰。徒死無益。濟詣闕上陳。請兵一旅。自效行間。如漢羽林孤兒故事。願從諸將出關。雪國憤。復父讐。斯亦忠臣孝子効死畢命之秋也。兵曹但覆補錦衣寶缺。以需後用。濟壯志不遂。製銳矛千枝。送部滅賊。又請仗節渡海。往勸李暉。李棕廢立之情形。并窺毛帥牽制奴酋之虛實。其忠憤驍雄。所謂非是父。不生是兒。



矣。若使濬領勇士數百千人。獨當一隊。仗以  
聖主之威靈。助以厲鬼之血戰。必能手縛賊奴。賊芳  
活者置之檻車。獻俘。死者剗其舌。霍其目。齶之磔之。  
支解之。祭忠烈公之墓。而後輿其喪以歸。豈不快哉。  
昔袁履謙與顏杲卿同坎。猶有死時一足也。張湊得  
杲卿之髮。妻疑之。髮動。猶有髮在也。今忠烈埋骨何  
方。返櫬何日。世路悠悠。如顏氏張湊之客。又何在。徒  
使九旬祖母。七尺孤兒。招冤望祭於數千里黃沙白  
草。淒風凍月之間。嗟乎。慘矣。慘矣。雖然。公能令叛賊  
修治民之禮。異類營忠臣之墓。又能令降者。逃者。盜  
餉者。中途觀望者。悔死慙死。恨不從公同難以死。則  
公之英風峻節。真可激發未死之英雄。恢復垂殘之  
遼局。豈直與何公廷魁。高公邦佐。鼎足稱山右之三  
忠哉。故陳子諾濬之請而爲之傳。



陸文定公傳

公諱樹聲。字與吉。華亭人。學者尊之。爲平泉先生。家世習農。公稍長。獨嗜書。族人毀其書。驅就田。跣而耕。蘆刺入足。趼中。歸則挾書。避人讀之。忽從杵臼間。習爲文。拾殘紙。錄文以呈族兄。驚以爲奇。勉就學。公父未之許也。公灑涕跣請。乃遣就里師授經。同舍生望見山衣田冠。姍笑之。久乃懼服。出試補諸生。高等。嘉靖庚子。舉春秋應天第五。辛丑。會試第一。以庶吉士授編修。久之。晉司業。右諭德。太常卿。署祭酒。再進吏



部右侍郎。公筮仕至老。頻告歸。頻召起家。壬申。令  
上嗣統。首召公禮部尚書。凡一歲五疏懇辭。得俞允。  
賜乘傳抵家。歸後。臺省交推無虛歲。上優異。賜  
輿廩。加太子少保。遣官詣里第。存問者三。冢孫景  
元。伏闕陳謝。特賜入監讀書。乙巳。九十七。無疾  
薨。手書遺命。無請卹。兩臺以訃聞。詔所司治葬。  
賜祭三壇。贈太子太保。賜謚文定。公前後立朝。  
徐文貞以鄉衮秉軸。推挽天下知名士。獨不得引公  
自近。其他分宜江陵。雖視士大夫如鞴鷹。棧驥。繩索  
寄手中。公麟鳳不可馴擾。所在冥引。挺正不少下。然  
以名德高。無所中。公退。亦未嘗不心服也。公居長安  
時。閉門養重。日與海內正人砥礪名檢。一切車騎詩  
酒徵逐之會。悉謝絕之。掌國子。屏去苛碎。以弘雅博  
大爲宗。著汲古叢語。及訓條十二篇。以式士。在禮部  
守法嚴勁。請托格不行。大司馬議增俺荅歲幣。公力  
主罷之。瀕行。上十事報謝。公宦業鄉行。始終以敦大  
體。重清議。堅晚節。爲第一義。其教子無趨捷徑。無匿  
權門。不通輦下書。不問戶外事。知足寡欲。卽臧獲皆



廩廩稟公尺度。公貧時。邑令朱公賙以鍰金。堅謝之。生徒從公游。不竟業者。却其贄不受。既貴。尤慎取與。不喜問生產。又不喜故爲敝衣。猶食以市名。且性好捐捨。迄白首不倦。所餘山田數頃。居廬僅庇子孫而已。公豐頰竦肩。長七尺有咫。目靜深。含光內藏。當日中抗對。不瞬眩。每入闕。昂立朝行中。姿表特異。穆廟登極。久趣公不赴。趙文肅公寄聲云。我輩豈敢以機務煩公。第欲主上一見丰采。知先朝培養得如此偉人耳。嘗奉旨宴朝鮮陪臣。使者望見公。

拱手改容曰。此陸公也。耶垂老家居。臺臣郡邑長首謁公。度且艱于酌對。及見公衣冠甚偉。龐眉皓白。精神注射人。更端伸引。惟吏治士風。閭師鄉三老之事。語不及私。當存問。端笏跨馬。郊迎朝使。拜趨翼如。事竣。跬步無失禮。皆詫歎以爲天人不可及。公少年善病。後益神旺。踰大耋。髮白加黃。兩輔如渥丹。能作蠅頭字。月下視夾注書。髯鬚間復生黑毫數莖。鼻息閉。不出入者。可兩時許。且晚臥起。飲噉步履皆有常。終身不見袒裪。竟日危坐。亦絕無疾遽陂倚之色。御



子弟和而莊。客至更衣肅入。初見未聽客拜。凝視良久。乃揖。揖坐。復凝視如初。稍就溫洽。始相與纏纏道故。或旁論他事。隱若中客膏肓。無不意消而去。文章元本理學。尤邃于易。談笑題咏。必關於世教。或時以二氏微瀾助之。其稱說古人成敗得失。及本朝掌故。卽二三百。年官爵里居。歲月姓氏。滾滾不爽毫髮。使人聽者慨然踴躍。若撫其會。余每恨國史郡志不及成公手。假公三朝見聞。裁以獨斷。其是非豈謬古人也。公雅志恬澹。精力克壯。堅意求退。甚於人之嗜進。

弟中丞公解節歸。尚未老。追隨杖履。人擬之二疏。公艱嗣。五十八始舉。丈夫子彥章。及見成進士。官行人。乞終養歸。又及見曾玄孫者。兩代攜子孫出游。卽老。雨甚風。俄頃開霽。每聞公至。聚觀者如堵墻。凡田童野老。以及緇黃者。流莫不愛慕而樂就之。公下車。閱耕問俗。咨便宜疾苦。間遇水旱。必移書議捐賑。民藉稍甦。生辰之日。攜香楮爲公禱於塔廟者甚衆。繪畫公像。徧遠近。名山薄俗。好訾議。或少年趨捷。喜凌侮。責備先達。至語公。皆歛衽嘆息無間言。歿之日。悲惋。



交屬會葬者萬餘人。里中幾於罷市。上牒當路。建特祠於龍潭。置祭田。郡縣春秋報享不絕。公生正德。歷肅穆二廟。及今。

上以身繫國家重輕者幾百年。身名俱完。父子兄弟皆以遠聲利。樂恬退爲家法。大行君當強仕。爲文誓墓。以見志。孫五人。恂恂恭謹。有雋聲。

陳子曰。余聞之溫公云。人之情孰不畏天子與執政。最愛者父子。其次祿位。人或老前無可冀。猶戀戀不忍舍。非勇者誰能割之。

肅皇帝端居西齋宮。大僚競撰玄文。以希上旨。公遜謝不預。是不畏天子也。分宜壽賀者皆衣緋。公獨否。庚戌廷試。分宜謀寘私人上第。公掌卷。故混之。分宜粹無所得。聲色厲。不爲動。入都。江陵首謁公。公接對殊簡。還報謁。引席正南。不少假尺寸。江陵餞公。公倨牀見之。抗手而別。其後怙勢奪情。不吊江陵者。亦終公一人而已。是不畏執政也。公宗伯求去。江陵以微言妮之。公曰。一史官二十年始出山。豈爲收門生覬宰輔耶。公弟中丞公。則又挽公曰。兄卽倦游。宜爲



孺子恩澤地。公曰。大行曰。吾得首丘。卽此見行歌負薪。亦任之矣。是又非父子祿位所能動也。公真可謂大勇矣。余生晚。公以小友遇之。每相見。命几置座隅。援筆講易。圖寫爻象。錯綜反覆。皆古人所未道。常手書示余。願諦歲寒之交。遺牘至今。爛然笥中也。及是。大行君又奉公命。屬之傳。余惟公立朝大節。炳若三光。其生平勤小物。護細行。世未必盡知之。余故識其小者。以備公四時之氣而已。然無如吾友周子紹節之善狀。公也。周子嘗謂公。高風漸遠。似陶元亮。而無餅粟之窮。耆年宿德。似高伯恭。而無夷主之危。祿位名壽。似郭汾陽。而無朝恩之譖。遊戲禪宗。似白香山。而無伯道之悲。潛神羲畫。似邵堯夫。而無冬夏之苦。忠信篤敬。似文潞公。而無子方之辱。守正不阿。似司馬君實。而無介甫之爭。遂爲古今完人。知言哉。



孫漢陽傳

公諱克弘。字允執。號雪居。先世汴之杞縣人。有靖庵先生者。隨蹕南渡。居武林。仁宗延祐初。伯英舉鄉試。後辟行省為廸功郎。上饒縣錄事。歸築映雪齋于西湖之上。元末浙東大亂。因遷于松。子昂夫。習春秋。洪武初。官武昌同知。凡數傳而至延平守雪岑公。雪岑生大宗伯。謚文簡。毅齋公。文簡三典文衡。新鄭高相國拱。婁江王司寇世貞。新安汪司馬道昆。皆出其門。宗伯得公最晚。恣愛之。自少有器量。以門廕。授應天



治中署上元邑篆。號稱清謹。擢漢陽太守。吏畏民懷。當衡王之國。水陸旁午。凡供帳厨傳。皆公部署。甚整而暇。路無驛騷。臺察倚重之。擬咨斬黃兵使者。會公遣書高新鄭。道逢徐太常僕。遂與俱入都。而新鄭方修華亭故郛。捕徐僕。省臣韓楫劾太常。波及公。而公免歸。公自此無復仕進意。遂于東郊故居。修築精舍。輦奇石。寘庭除。環列鼎彝金石。法書名畫。摩挲其中。滌除酒掃。屏榻如鑿。客至命張具。鼓吹遞作。童子按院本新聲。間舞後猊。及角觥之戲。人以為安陵食。綱川庄。不是過也。公既以豪聞江東。而又坦直無他腸。四方客輻輳進。稍挾片藝者。公居停之。推轂之。甚則解衣授餐。使得所而後去。故人疎族。一遇之以誠。款洽餽遺。老而不倦。嘗笑曰。坐上客常滿。尊中酒不空。僕于魯男子。差無愧色。公性巧慧。喜摹古。卽一棖一桷。一木一石。生生曲折多位置。所居聽雨軒。東皋雪堂。敦復堂。赤霞閣。期仙磴。老圃。茆齋。夜雪。其四壁皆寫畫蒼松老栢。崩浪流泉。使人凜然不凄而寒。有澄泓蕭瑟之意。客退。就明牕。棊几間。或臨古畫。或抄異



書有挑以俗事。及家人生產者。掩耳瞪目。若將浼馬。公正書做宋仲溫。隸篆八分。追踪秦漢。初寫徐熙趙昌花鳥。晚年畫馬遠水。米南宮父子雲山。遠近于請無虛日。人有贗貌公筆。以衣食者無數。當路懸購。十不得一真。率采聲而已。公聲音洪暢。狀貌踈野。居恒好着民間平頭帽。旁綴小金瓶。又好寫笠屐小像。彷彿皆晉唐遺風。非近代以下人物也。漢陽蕭象林爲平湖令。與公無生平交。而契慕特至。公感其高義。往候之。蕭虛左如執弟子禮。及其歿也。匍匐風雨中。拜之于墓。楊修齡來按吳。表公墓曰。暎澈九泉。其爲人仰止如此。公無疾而逝。年七十有九。得一子早殤。擇族之文而賢者爲之後。曰世爵。華亭邑諸生。拮据葬公于細林山之陽。

陳子曰。文簡公官太宗伯。三典試。門生半天下。其所遺僅僅負郭一區。确田七百畝耳。公自少逮老。賓客聲酒之費。垂八十猶未衰止。而能保有文簡公遺業。不失尺寸。何也。蓋亦有德矩寓焉。今世家子。喜狎非類。不知何者爲名士。轟飲夫嚼。不知何者爲名畫法。



書彈指流盼之間。洄若驟雨。崩若潰墻。而身名與草木俱腐耳。風流儒雅是吾師。舍漢陽公。吾誰與歸。

玉峯道人傳

錢塘有玉峯道人者。世居吳山里。結茅山下。環侍木石。客至彈棋賦詩。燒茗葉。間稱引往事。袞袞不去口。風日清妍。勅童子負壺。往來湖山中。經旬忘歸。歸則坐臥一小閣。讀三氏九流之書。性好菊。多名種。當午夜臥起。不憚風露。手灌籬落間。及秋羅菊閣上。傾家釀。邀賞無所惜。父母篤老歿。道人白髮倚杖而號。喪葬畢。得心疾。當死者數矣。編席爲龕。日夕坐不出踵。息成病良已。垂耄耄。顏如渥丹。黑毫生。行游市中。兩



肘如風舉。與之坐。氣韻沉古。疑樛松怪石。靈巖古洞。而若有遇焉。天性恢達。耻機事。多與少取。面數人。人不爲忤。事母極孝。母嗽于側室。李命逐之。道人憐其賢。扃李一室中。穴壁授餐三年。母大悔。召李歡如初。其仁孝多此類。道人四十六。長子之翰。殤無嗣。朞月夢登高山。可萬餘丈。下視奇峯。臚列。上有紫芝碧草。珍禽鳥無數。入朱門。歷階上瓊宮。玉几有帝憑焉。授道人圭。拜而出。視壁門榜之翰名。已更抹去。易之惠。遂覺。呼郎母而語之曰。帝錫圭。且錫嘉名。殆舉子乎。俄舉子。駭而名之。卽天下所稱大儒鄭之惠者也。道人曾爲粵參軍。再倅太倉。會大征。縛劇賊梁仕興于新寧山中。賑饑活十餘萬人。埋俘孳骨。稱是築三水南海堤。捕煮鹽豪少年。却暮夜千金者二。所至檄署壯邑。使者上書最治狀。比去官。父老持牛酒勞送。擁馬首不得行。皆故事寮幕所無也。道人諱炳。字文輝。于新會祀陳白沙。又從甘泉湛先生遊。婁東與王汝中最嫗。故晚年著書類有道者。年八十有九。匿跡家居。不自名官人。而好山澤游。自稱玉峯道人如故。



樵史曰。昔南陽馮良。三十爲尉。迎督郵。慨然裂衣冠。壞車殺馬。遁十年不歸。妻子至。發喪制服。何其詭也。獨龔勝爲功曹。三舉孝廉。再爲尉。一爲丞。哀帝徵諫。議大夫。多建白。其後不食。以謝新莽。忠節甚著。道人逢時能爲勝。不逢時亦不爲良。其古之吉人哉。之惠撰述有測莊。莊砭老子解。及他書甚衆。跼進道人。道。人笑而領之。蓋父子相師友云。

### 趙瞻雲傳

瞻雲子者。姓趙。名淮。字源長。太倉人。七齡而喪父。又七齡而喪母。遂自號曰瞻雲子。志思也。三娶三失偶。性不喜孤坐。好苦吟。顧獨爲瑯琊兄弟。及太原父子所知。瑯琊歿。王文肅公解相印歸。與公日益嬖。所居去文肅南園不數武。文肅巾車過園。輒物色趙翁。在否。在則相與把臂入林。分蘭菡萏。舉觴鬪碁。率抵暮。以爲常。翁又精小兒醫。自文肅以及諸縉紳家。多迎公爲上客。決死生如神。而他若單赤孤貧。委巷庫屋。



必側身趨視之。去亦不復問報謝。詩壇酒社。及浮屠老子之宮。每有勝游。公不以事辭。亦不以筋骨爲解。或風雨載途。霜月挂樹。而公赴必人先。歸必人後。酒酣耳熱。曼爲長謳。四座辟易。卽羣少年。竹肉滿堂。噤無敢發聲者。性慷慨重然諾。人以緩急告。雖酣極燕笑時。輒愀然舍去。凡爲人經營勸導。宛轉詞色。間不啻身當之。貧者炊暴者葬。具得公力居多。公父事兄。母事嫂。待孀姊存歿。皆有恩禮。與人交坦直無他腸。所談皆道義風雅節俠。未嘗以俗務經懷。獨不耐齷齪市人態。甚則內嘔。至義形于色。雖富貴人。富家翁。折行就之。而心不服也。當文肅鼎盛時。坐無公不懽。公抗言無忌諱。退亦罕所干請。文肅每嘆曰。吾閱人多矣。若口無佞舌。腰無媚骨者。其隣叟瞻雲子乎。及文肅父子相繼捐賓客。物情炎冷。羶幾百變。而公以一布衣交。始終懃存。太原家如故。文肅存不加腴。亡不加瘠。衡門吟咏。老而不衰。其感恩報知。勃勃鬚髮。胸抱間。則又古高漸離侯生之流亞也。惜里中知公者鮮。故于七十有五時。爲作瞻雲子傳。



江陰貢太公傳

太公諱賦。字明善。別號暨陽。其先大名蒲城人。宋南渡徙宣城。始祖師元。又徙江陰。三傳而以科第起家。曰斌。為戶部員外郎。生子曰學靜。為南臺御史。劾瑾璫。廷杖削籍。再召山東按察司僉事。學靜之季子。為龍陽翁。龍陽之季子。為暨陽公。少開敏。落筆有雋聲。屢試童子科。被放。因太息廢書。代翁支大役。腹筭口占。不屑屑為纖嗇機利。周孺人櫛束舍人兒。又甚整而賢。家以此漸饒。龍陽翁逍遙寡營。但召酒人為轟



飲飲且盡一石。旁指公笑曰。老人臨食不嘆甘寢不  
魔。此伊誰力也。公與伯兄姬。所居距數里。餉遺書訊  
不絕。兄中危法。公傾貲挺救。始無恙。退亦無自功之  
色。遠近有緩急告者。立應之。應而負者置不較。契券  
盈筭。視若故紙。并不知其爲誰何氏矣。性伉直。聞爽  
遇可恨人。及可恨事。輒颺去。不則痛詆之。卽名流貴  
介。凌折無所憚。酒後耳熱。面摘人宿垢。隱癢。聞者口  
噤。手顫。幾欲穴地入。而公刺刺不少休。諸子跪諫之。  
公咤曰。汝欲我爲無口瓠耶。第善詈。旋亦善忘。舌有  
肝腸。胸無柴棘。雖置公刀俎上。公飲噉狂笑自若。不  
能難也。公恨不竟儒。而癖書甚于儒者。每讀司馬氏  
資治通鑑。手錄忠孝烜赫者。粘之座右。以代義方。又  
念南渡後。宣城陽旰晉陵之族。散佚不收。纂成貢氏  
譜。良史嘆謂爲弗如。二山君癸卯舉于鄉。公志意益  
發舒。與周孺人陰爲德甚力。撫嫡兄之孤如已出。迎  
王氏孀姑。養之終其身。不修故郟。不闖戶外事。從廢  
圃故園。芟刈䟽治之。藝名花。灌修竹。傾尊仆斗。奏肉  
飛絲。燭跋雞號。未聽客去。邑令肅公爲賓飲。公笑曰。



田庚野老。不能與子大夫相周旋。請辭。公酒杯流行。諧笑錯出。似狂。爲人畫策解紛。不顧毫髮利害。似俠。清議格物。嘗持是非名教。以誦其座上人。似戇。陳子一言以蔽之曰。貢太公古之遺直也。公歿後。二山君成進士。宰東陽。推卓異第一。其諸子皆以文行有聞于時。陳子曰。世人談笑有鑠邪。故秀鐵面。以嗔作佛事。世人對面有九疑。故灰袋道士。張口如箕。五臟畢露。古之得道者如此。而又何疑于太公乎。太剛則折。公不以剛損。太直若曲。公不以曲免。孤行壹意。得全其天。爲布衣則公爲綉衣。則抗疏瑾璫之名。御史家風剛直。易地皆然。信貢氏祖孫之有種也。故諾東陽君之請。而樂爲傳之。



太學吳伯羹傳

吳伯羹。諱守和。自號斗岳處士。諸吳衍於新安。獨吳田著。繇吳田徙隆阜。又隆阜著。隆阜之吳。三傳而下。皆卓鄭起家。其易賈而儒。以經明行修聞於時。則自伯羹始。伯羹奇穎。自少展卷。一覽數行。弱冠補諸生。再試高等。郡大夫遴爲紫陽書院長。與名流結社。比時太常邵。中丞羅。柱史黃。皆虛左推伯羹。人人厭其意。爭自濯磨。以質大業。相繼先登。而公才高見格。游梁谿。訪顧涇陽兄弟。把臂甚驩。已遊成均。兩司成有



國士之目。入棘罷免。伯羹嘆曰。海中三仙山。舟近不踰尺。爲風引去。豈技不及吾儕乎。命也。歸休乎哉。太公春秋高。繼母卞急。伯羹夔夔孝謹。能令霽色解頤。親亡。悉委家乘於諸昆弟。季子蚤夭。無後。命其子爲之後。性不近。馭僧。手不親握筭。索不私尺帛寸鏹。弟擇其大者。部署擘畫。首勅宗祠。次營冢墓。徧乞四方巨儒。上衮之文。伐石琢辭。以志不朽而已。江陵丈田之令下。遠近驛騷。伯羹慷慨條便宜。肩劇剗煩。父老倚之如左右手。卒以報命。里中有違言。質成伯羹。爲從容劑解。甚則損金錢無所吝。廩饑民。埋道殮。以至橋梁道路。緇素之告急者。未嘗以他辭爲解。居恒下帷。凡六籍百家之書。訂頑抽秘。擷秀咀華。日進五屬。子姓于文昌祠。身爲都講。絃誦之聲相聞。博士弟子員纍纍矣。舊有杏村書舍。伯羹芟奧草。蒔花竹。日與故人嘯詠。以爲常。志意高邁。議論豁達。雖公車不售。而士大夫莊事之。如通德里。如畏壘鄉。抑亦古先生長者之矩矱矣。狀貌偉岸。廣頰豐眉。踰七十神明不衰。端坐而化。子八人。孫十八人。曾孫四人。婚娶皆名



明香室 卷之十七  
族詳志狀不具書。陳子曰。顧涇陽兄弟。講道東南。官雖不甚顯。而身後贈卹之典赫然。斯亦儒者經明行修之報也。吳伯羹與之同時同志。涇陽百一稿。伯羹敘而傳之。而獨以韋布終。烏在其重儒哉。古之儒者。天子或遣高才郎從講。或勅大官具筆札。就家受書。錄而奏之。今伯羹不遇于時。而能以平生之所學。課子孫。教後進。隆阜之吳。比于鄒魯。視卓鄭所得孰多矣。涇陽嘗徵余文以表其父母之墓。今復爲伯羹傳。皆不愧有道碑者。故不辭而敘之。

### 馮甄甫傳

馮甄甫。明州人。初名若臯。已更臯爲陶。甄甫其字。號遂昌。方伯修吾公季子也。家世多名臣。纓綉相望。而君獨通脫自喜。好輕俠。迫之就帖括家言。笑曰。諸葛武侯畧觀大意。淵明不求甚解。此古人讀書法也。烏用是小兒號嘍爲。吾聞至人多好醉鄉游。近無復問津者。請撫髀雀躍往矣。性食酒。洪飲無章程。方伯肅括之嚴。君醉歸。調方伯起居。急盥櫛。問寢上食。周恭人臥病。却藥餌不嘗。君手調以進。輒頷而受之。方伯



試之家政。君任心獨詣而能行。方伯意中事。往往爲君解頤。君後篤疾。猶強起。故作健步武。以寬兩尊人憂。其密行多過人者。與人交。有面規而無腹背。有坦中直腸。而無軟言。夢語。有立談卽合。暴發卽解。而無終身不釋之憾。有叩必應。有應必如其所欲。未嘗叉手硬坐。轉睛不相屬。置人緩急於度外也。性好古。喜集法書名畫。延勝士焚香品題之。遇佳山水。爲橫琴作雅操一弄。味其雋韻。似將折節改絃。不終以酒人自雄矣。然每當志敞意得。鼓三搥。雞三號。猶嚴扃門戶。倉卒不聽客歸。客亦不忍遽言去。觥籌交飛。排調錯出。強沃之家釀。不沉醉不休。竟以酒得病。下痢十日死。享年僅二十有一耳。君狀貌魁岸。廣額高準。豐下。目光燁燁。注射人。羈卯時。能控惡劣生駒馬。上下山坂。見者無不辟易。而君執轡如組。馳驟若飛。假令君今日尚在。目擊奴酋不逞。君必且散金。結海內劍客。椎牛擊酒。突行而前。博遼東一姝。死戰以報累朝厚恩。漆奴頭。飲奴血。豈作偃蹇寒書生。枕酒徒膝上老耶。馮元仲才子也。痛父酒亡。而母孺人陳氏。



又以節殞。極引古人酒戒。便欲毀尊罍。仆觚斗。殛儀狄于羽山。放杜康于三危。焚醉日于秦坑。囚酒星于天獄。盡大地秫田。悉化爲斥鹵荒蕪。而後始無憾。余曰。不然。自來酒豪如李太白死。如狂旭顛素死。嬰兒不解酒。解乳死。張蒼百餘歲。噉兒乳亦死。盧仝陸羽飲茶死。屈大夫不餽糟。不啜醢亦死。則酒豈必能盡死人也。唐鄱陽王素節。得罪被逮。路聞哭喪聲。嘆曰。人求病死何可得。而尚湏哭耶。今君不死于病。而卽死於酒。勝唐王孫遠矣。奚其悲。奚其悲。陳子滿浮大白。酌君牛山之墓。呼而問之曰。甄甫復能飲乎。試讀我身後數行傳。何如君生前一杯酒。



安硯亭先生傳

安茂卿諱紹芳。居無錫之膠山。山有滌硯亭。因自號硯亭居士。安氏自勝國及明。多豪傑鄉長者。嘉靖間。有如山公。登己丑進士。選庶常。守裕州。歷雲南僉憲。生少峯公。希堯。希堯生二子。長光祿。署丞硯泉。次卽公也。公自少眉目娟秀。顧盼迎人。舉體無凡。雅有貴表。僉憲授以詩句。心開意明。十歲工詞翰矣。稍長。讀先世藏書。動以寸計。當廣坐。拈一題。下筆衮衮。氣吞多流。而獨好有韻語。不輟。少峯公呵禁之。扁一室。顯



精公車言。遂與伯兄同裹青衿。稱安氏雙玉笋。是時甫十七。娶吳孺人。孺人屏謝時世粧。德業相勗。公不復展轉內顧。刻苦下帷。視一第如解衣相似。會貴人子。爲狡獪所穿。波及公。廢書。曼聲聊蕭不自得。跳身者久之。聞少峯公。呈家難。曰。白門紅板。桃葉竹枝。豈吾事哉。疾趨歸。內外之闕立解。而僉憲公與王安人。後先捐館舍。公匍匐治喪。墨瘡不能起。見者傷之。服闋。散橐裝。結海內墨卿劍客。入京都。上書白寃狀。投刺巨公。卽陸平原。謁張壯武。王仲宣。謁蔡中郎。無以過也。奏下南法曹。首鼠者居半。公嘆燕邸不可以久留。還里門。得視少峯公舍。檢奉母命。析產。肥瘠聽兄。毫髮不以屑意。家有西林一片石。多偉木。壽葆公。疏清泉。累層臺。構傑閣。結幽亭。蒔竹種松。分蘭莖菊。時時命魚舠鹿車。往來其中。築肉飛絲。傾尊仆石。雞號燭跋。不聽客歸。客擬之安陵食。輞川庄。詣門者。基舄相嚙矣。稍挾片長。公居停之。推轂之。甚則解衣授餐。使得所願而去。公雖豪舉。聞江東。酒後耳熱。勃勃若有碍膺者在。再上書走闕下。賴劉侍御挺身直其



冤公乃更名泰來。字未央。拮据葬父畢。裹篋北雍。已酉戊子罷歸。辛卯幾入格。會房考爭甲乙名。兩報罷。公自此半耗雄心。又苦艱子。建白榆閣以祝多男。連舉丈夫子五人。稍稍喜見大宅。形諸詠歌。命子珩嗣其亾兄。告廟行禮。未幾喪母。又喪婦。笑不勝啼。喉嚨間咯咯失音。形容憔悴。竟不起。春秋僅五十有一耳。公彌留之頃。絕無恚戀。撫瓚頂。目瓚者再。已而嘆曰。吾生平器高局遠。不屑屑齷齪問生產。然歷盡苑枯炎涼之感。瀕死者數矣。丁卯歲。幾落奸人猾胥筭中。

可以怖死。詣

闕三上書。纏綿十二年。莫適爲援者。

可以憤死。七入棘闈。不一售。可以慚死。哭父哭母。哭伯兄哭婦。又哭殤兒。可以痛死。嗟乎。造物以六親刀俎我。七情爐炭我。徃役鼎鑪我。又以虛懸不實之功名。爲且吞且吐之雞肋。以掉戲我。其幸而不死者。外則登眺有名山大川。交游有文人才子。內則司封公。肝胆相孚。膝下雛眉。日如畫。而又幸有醉鄉詩社。金石鼎彝。破愁懷。結塵想。故得延歲月至此。然吾豈沉湎酒人。風流教主哉。公豐頤廣額。雙耳垂珠。然諾不



輕諧笑錯出。親知以緩急告者。未嘗以冷面相拒。司封公創義田。公佐產以贍貧族。處閭閣無褻容。交貴游無諂骨。暇卽枕漱。百家六籍中。過目成誦。畢身不忍忘。字臨曹娥碑。畫摹大癡懶瓚。旁寫蘭竹。別具一種清芬。里中兒童購不易得。姑以自寄。其瀟洒標韻而已。郡大夫嘗以修志。敦幣聘公。志成。嘆賞有良史之法。詩名青萍集。二京集。芳草編。西村纂。行于世。皇甫子循序其詩。王元美爲西林記。其他四方名公。往復報贈者。不勝書。子五。長殤。次玉瓚。次珩。次瑤。皆孝謹。嫻文章。卓然有父風。

陳子曰。余屏山澤。不獲交茂卿。然時時聞之。吾友徐長孺曰。安公動無缺彝。言無判德。凜凜篤行君子哉。獨以沉寃未洗。榮名未立。寄跡交游詩酒間。以夷其胸中五岳而已。假令早遇顧叔時諸君子。雍雍弦誦。必且虛席爲東林首座。豈至偃蹇西林一片石也。故有感而爲之傳。



以所求未成。榮谷未立。寄觀文。批書。函。回。以。其。其。  
是。語。曰。安。公。雖。無。姓。彙。言。無。性。對。稟。稟。萬。計。子。造。  
刺。子。曰。余。氣。山。窮。不。變。交。效。嗚。然。都。都。聞。之。吾。文。余。  
讀。歐。文。章。卓。然。肅。父。風。長。功。人。主。其。

### 有道鳴鶴李公傳

鳴鶴李公。諱可教。字受甫。上海人。卽聘辟不應。仲昌  
之后也。仲昌生守中。守中生原芳。原芳生珙。珙生伯  
輿。宣德元年舉于鄉。官淮府長史。生十子。長曰澄。天  
順元年進士。官福建參議。次曰清。景泰五年進士。官  
湖廣左布政。八曰深。淮府儀賓。四曰湛。卽公曾祖。湛  
生貢士傑。傑生煥。然爲晚峯翁。翁得公最暮。十二善  
綴文。貞齋趙翁試一題。援毫立奏。遂遴爲贅壻。子視  
之。十八補金山衛庠生。才名曷奕。弟子北面者。屢滿



戶趙翁連舉二雄。公謝曰。某可以歸矣。歸則舌佃以  
供兩尊人。具甘毳甚腆。晚峯翁爲撚鬚捧腹。幾忘其  
貧。翁亡。諸子驚遠游。獨公拮据治喪。造次纖悉。准禮  
家言無憾。行營善地。不惜罄產。贖坏土于祖墓旁。費  
且鉅。匿不令母氏知也。四子迎養母。母過從公頗數。  
曰。老人非私少兒。但覺兒夫婦。酷知我痛痒冷熱耳。  
公授經他所。母疾輒怛怛心動。遙歸。欠身榻旁。爲搯  
色聽聲。疾良已。飲食衍衍者十餘年。已棄杯棬。公墨  
瘠焦枯。幾類死孝。卽春秋饋奠。猶作孺子啼。目爲之  
青。而篤愛典墳。有皇甫士安之癖。每念先世儲書。積  
至萬餘軸。嘉靖間。倭奴闌東郊舊居。委書泥淖中。填  
踏而過。自後不復。更能收合。則多方訪購之。自六籍  
百家。以及山劉冢刻之屬。皆抄纂標序。細加丹鉛。揮  
汗呵冰。眠食減損。碎叩之某事。云出某書某卷某行。  
且指數以對。鈎引貫串。應聲如響。卽容軒公集。與武  
經註疏。其手跡歷歷猶存。蟻鬣蠅頭可念也。龍郡丞  
念公久困學宮。將無爲風氣所錮。移文更之。不允。公  
笑曰。雄飛雌伏。宰物自有權輿。老蠹乾螢。此儒者事。



也。遑問其他。于是下帷益淬勵。課趙氏二子。皆補諸生。以報貞齋翁。而程督逢原。逢申不假貸。小拂意。爲攢眉愁嘆。二子見之。凜凜甚於鞭笞。董中行貧而才。垂三十。猶試童子科。公器賞其文。妻以女。次年遂登賢書。宗人敬庵君。素封艱嗣。雅屬逢原。公曰。非望之福。道家所忌。暴得萬金。不祥。兒何德以堪之。請辭。已而聚族爭立。立者之產。悉殉於仇家。而訟終不解。公潛爲營救得免。而身則泌水衡門。朝絃暮誦。父子熙熙如也。事伯兄。女兄謹。兄之女適倪而嫠。公不絕餉。遺旣歿。祭奠皆成禮。與配趙白首相莊。六十年如一日。絮語不加于童僕。惡聲不及于犬馬。介行矩步。鈍口。眸容惓惓。以惜福。擇交爲第一義。不喜見羶熱貴游。亦不喜赴讀法鄉飲禮。曰。山衣田寇。未嫻罄折。所羨惟闇然篤行長者而已。丙午逢申捷音至。公笑曰。差慰寂莫。已罷免歸。亦不色慍。曰。兒豈薄孝廉乎。吾家養庵公。何如人也。逢申結草堂於笏谿之南。公過而樂之。賦詩云。此堂未易言卜築。寒士三年構一屋。砌石栽花見遠情。板橋曲沼成幽谷。從古豪門鬪麗



華只今何事傳。邁軸愛我郊西半畝宮。歲歲春風醉  
醺醪。其他登臨觴咏。率本之性情。而無郊寒島瘦之  
病。晚年目疾。詩亦屏去。強半茹素。奉竺乾戒甚虔。笥  
稿不留。今逢申僅刻十之一。曰碧梧軒詩系。與容軒  
希獻兩公竝傳。鼎足不朽矣。享年八十。墓在小崑山。  
三子。長逢時。次逢原。郡諸生。又次逢申。以萬曆己未  
舉南宮。拜慈谿令。聲績著聞。甫擬奏滿。而以今  
皇帝御極。覃恩。贈公文林郎。如其官。

陳子曰。李氏自洪永宣景天順以來。纓黻蟬連。門業  
比于王謝。及公已貧甚。而孜孜好善好書。老而不倦。  
豈非真清白吏子孫乎。古者賢良文學。坐持國是之  
平。御史大夫。跪受濟南之簡。晚至宋儒。經行可觀。天  
子用宰相奏。選書吏給筆札。錄其書藏之秘閣中。今  
公經明行修。豈出古儒者下。而綸不挂半通。養不待  
五鼎。識者相爲惜之。猶幸身沒以後。慈谿君捧 譽  
命告於泉臺。鐫詩系傳之。稅苑。積德于子孫者必貴。  
積書于子孫者必文。誰云天道無券契乎。易曰。鶴鳴  
在陰。其子和之。公父之謂矣。故諾其請而爲之傳。



松陵爛溪周孝廉傳

周公謹諱應愿。松陵爛溪人也。其祖恭肅公爲

肅皇帝名臣。四傳而生公謹。五六歲能受書。動及千

萬言。其父命屬文。卽以文奏。命屬詞賦。卽以詞賦奏。

援筆應聲。如出宿撰。父摩頂曰。恭肅再生矣。十五補

秀才。十九餼于官。試必冠。曹耦。邑大夫擢寘第二。公

謹憤懣不能寢。盜兩入其舟。驚撼而去。已試督學。不

得志。遂入太學。三試京兆。兩備本房乙卷。時有郝侍

御。素有國士之契。憫勞羈旅中。公謹據掩袂憔悴泣。



郝公曰。昔公孫嘗退歸。鄉人再推射策。遂第一。劉向書數十上。每聞報罷。而終爲名臣。才如公謹。豈無泣血以相晤者。何度之不廣也。公謹拭淚謝曰。某亦志士。不屑俗儒。豈以功名未就。志意挫衄。第堂上老親。冉冉日昃耳。戊子就試。中順天榜。一時名噪都下。車騎填門。寇蓋盈坐。顰笑吐涕。奉爲指南。已而南宮罷免。名士送者如雲。贈別之章。不可勝紀。父當六十。先期介觴。束錦羞璧。傾動遠近。俄遭至痛。公謹哭不成聲。形容枯瘠。襄事以後。輒已放絕塵內。無論生產。卽

至親罕得遘其面矣。公謹生平意勃勃。自謂唾功名于掌上。健鷹孤鶴。且暮掣摩霄而去。志意不遂。退而深沈著書。每恨宋史成于胡兒。漉漫穢弱。幾同酒肆簿籍。于是辨定名稱。隨條甄舉。收拾亾遺。綴補前事。冀成一家之書。而精神尪頓。痼疾遂作。僅可得十之六七。服闋計偕。進舟京口。忽憶慈母。廢然而返。自此臥疾。凡八載餘。憤憤中猶能酬荅箋啓。間作飛白。手不停編。口不絕咏。識者擬之杜預傳癖。皇甫書淫。不。是過也。公謹自登賢書。絕不爲官府請託。里黨之中。



間有踣不能振。枉不能直者。輒為申理。否則。即子弟  
堅謝之。囊百金詣門。立斥之。祝使君王少府。雅重公  
謹。祈為道地。不可得。得公謹片言。隻刺。如魯連矢。柳  
下鼎云。性孝友淳至。居家雍睦。而御僕妾如朝典。內  
外有求于公。謹者。未嘗辭以故。往往售產以貸人。人  
負之。亦不復責。所居五臥之宮。花竹回互。鼎彝奇石。  
法書名畫。具豐。右縹囊。縱橫架上。自經史子  
集。旁及二氏九家。以至兵法禽遁博筭之流。無不該  
覽。而于六書尤得三昧。先著印說二卷。行于世。文章

好說龍門扶風。詩擬黃初。間及大曆。江左集四卷。海  
內尚以未見為恨。公謹兄弟三人。應憲。應懿。獨于懿  
根蒂千古。漁射時流。迤演精深。未見其止。每當燕集。  
羣從輻輳。觥籌觴咏。次第間作。頗有竹林王謝之風。  
而篤摯故舊。非法不言。恬靜寡營。不妄臧否。實與公  
美若出一人。故當疾亾。公美哭。兄如哭。父母。綱紀後  
事。摩撼斯文。斯亦見生平友于之所暘也。年三十有  
九。無子。子公美之子。邦鼎為後。  
陳子曰。昔唐元徵狀元。嘗謂余。從友人得論策一卷。



讀之博洽奇麗。至口噤手顫。而莫知所措。蓋周君應  
愿所撰也。然此特公車言耳。若使置公。謹東觀中。專  
掌昭代國書。推究總括。如李延壽政典。姚思廉時政  
記。未必不能辦此也。乃爲造物撫窘。所修宋史。僅得  
強半。未有指歸。文士無年。運丁百六。環回手澤。一字  
一嘆矣。周氏曹大家。其在公美哉。其在公美哉。

光祿惕庵林公傳

公諱某。字仲美。號惕庵居士。錢塘人。其先有灌庵先  
生。篤老知未來。相傳爲仙蛻去。生子岡。家始饒。岡生  
六子。長曰恩。恩父子竝蚤世。賴沈孺人。以苦節扞戶  
內事。李直指疏聞於朝。特詔旌閭。是生清泉公。亦  
以尚義表厥宅里。號稱名閭云。清泉公娶張宜人。舉  
長公京兆理。公費孺人出也。自幼淳恪。鮮少年之過。  
下帷錠戶。以文籍自娛。太宰張公。題其堂曰博雅。以  
勗之。公與清泉公偕游太學。清泉公捐館舍。公弱冠



毀瘠幾于滅性。拮据喪葬。悉絜禮家言。事嫡母張宜人。善望意旨。上食侍寢。視費母加虔。甘苦必與俱。笑啼必與共。張喜甚。頓忘其嫠居嘆息之聲。旣析箸。有挑公尋端於伯氏者。楊孺人曰。乖同氣。不祥。爭小利。不讓。傾家橐以徇官府。不智。公笑而領之。事立寢。終身無猜色。退而亦無後言。少病。不任讀。費孺人勸之。仕。拜光祿丞。歸則費母尋棄杯棬矣。公洒涕營葬。不復更夢春明門。卜築北郊間。饒有水竹橘柚之勝。三雅而醉。三商而起。于于喁喁。甚樂也。暇則筍輿葉艇。

結社西湖。與京兆羣從。指顧孤山老梅間。爲酌酒適翁慕而返。姚罔卿子元愷。貧于儒。公婿也。收卹其子。若女。不啻已出。曰。叔敖負薪。西華衣葛。古人耻之。吾亦耻之。吾非戀戀兒女情。直以清白吏子孫可念耳。楊孺人喜奉竺。軋書。旁遴名媛。以廣胤嗣。而公伉儷彌敦。壺政甚肅。適遭鼓盆之戚。且哭且病。奭傷厥心。久之。遂不起矣。公任真率素。出于自然。與人交。剗去智囊鋒刃。一切以善氣迎之。忠信足以感狡獪。和易足以諧怨爭。善不近名。施不祈報。每見機利浮少年。



行乎功名干戈之場。泛乎衆目風波之上。卽掩耳障  
面。謹避之。不善食酒。而能與客浮巨觥。不倚素封。以  
侈靡相高。而能被裘褐。噉蔬糲如故。眼不作青白。口  
不挂雌黃。而能識人情之涇渭。物情之銖兩。多子子  
奇中。不喜謁大吏。赴賓筵。而能委蛇巽下。未嘗以惡  
聲加于厮伍。庄客如王曇首之演慎。江淳之崇檢。無  
以過也。于聲才甚高。名甚噪。屢困公車。北游京輦。謁  
選一階半級。便可尾公爲巖居川觀之游。左手携琴  
書。右手扶杖履。父子熙熙。敦厚退讓。彷彿古者萬石  
百忍之遺風。日月豈有艾哉。而不幸公以訃聞。孝子  
嗷號。被髮頓足而嘆曰。天乎。吾顧不如楊家婦割股  
療姑乎。姑卽公配婦。乃大京兆淇園公女也。余別有  
傳。

陳子曰。余與于聲交。才品俊爽。與之談。軒軒似欲颺  
霄漢而去。匪獨京兆公之快婿。抑亦稅林中之快士  
也。一官雞肋。豈伊所好。意在善養太公。豈在祿養乎。  
于聲客燕中。不及視公含殮。徵文於能言之流。爲死  
者不朽計。余旣先爲楊孺人傳。及是又且傳公。彈指



不數年。而萸野鹿門之德儷。溘然俱盡。無論爲人子者。殊難爲懷。卽僕于人世存亡苑枯之感。宜何如也。捉筆不覺爲之三歎。

公諱三才。字士中。別號叅宇居士。其先世爲汴人。始祖有爲。將仕郎者。南渡家海上。數傳而獻公爲饒州府轄。鍊公爲藩府典膳。公大父蘆江公。又爲蜀都司。椽生。訥齋公。授留都司城。配唐孺人。有賢聲。舉丈夫子二。公其長也。公少稟至性。雅不好弄。髮未燥。莊若成人。閤師鄉三老。皆屬之。稍長。值倭奴躡境上。避兵。檣李。時暑。月病熱。公浴城濠中。多祟。浴無脫者。公沒。又之。憑一木而起。獨無恙。親黨益異之。年十三。從石

叅宇何公傳

公諱三才。字士中。別號叅宇居士。其先世爲汴人。始



城李翰峯儀部受書。屢就郡邑試。輒高等。而獨不利。督學使者公下幃。搯磨靡間寒暑。年二十二。從訥齋公宦游金陵。而翰峯李公亦起家。戊午賢書。爲少宰。海虞瞿文懿公所器重。諸郎君皆北面受學。公以舊時立雪。得分半席焉。一時名士。若太史焦漪園。余幼峯。皆與公爲筆硯交。每設一難。豎一義。未嘗不反覆辯詰。若勁敵然。學成而歸。屬楚侗耿公。校士至松。卽拔補博士弟子。徐文貞公奇公卷。召見之。曰。此真古文。亦真古人也。公素不好咏歌。或強屬之。則笑曰。丈夫旣已屈首經生制義。當破除萬卷。異日木天青署。自有大用。何至刻畫宮商。如歌兒啼鳥。供人調笑爲哉。于是益肆力于文章。其所撰著。于性命多所發明。而更佐以主氣之說。每入棘闈。日未晡而試草已削。洞心破的。語語出人意表。然竟以數奇罷免。丙戌秋。訥齋公捐館。公絕而復甦。哀毀骨立。鬻產以襄大事。退而與仲弟析箸。不問多寡。不計肥瘠。不告宗黨。不設盟言。內外皆稱其孝友。未五十。卽謝去青衿。放浪棋酒。與人處。廓落無他腸。有以機事挑。或語及時政。



者公卽引袖起曰。吾輩閒身。自分與草木同腐。幸不  
卽填溝壑。惟宜逐鹿豕。課花鳥。一斟一酌。以點綴太  
平而已。何乃與人家國事。言者慚慙而止。性淳厚溫  
克。湛然如玉之在壺。故不肖者遇之。自愧形穢。而賢  
智者就之。更覺神清。名宿重人。忘其爲寒士。農師野  
老。忘其爲名儒。至比之周元公。王徵君云。居恒好種  
植。蕃蘚盈庭。而最喜客至。治酒。酒酣談笑。雜以詼諧。  
月白霜清。不聽客去。是以產日挫。無何。而母夫人唐  
去世。公哀號一如。訖齋公。每憑棺而慟曰。不肖子無  
狀。生不獲爲親捧檄。沾升斗祿。歿不能致千里客封  
墓上碑。九原有知。何以覘顏人世。乃拮据經營。喪甫  
畢。而疾亦作矣。生平嗜古成癖。與仲弟士衡。情若友  
朋。至疾篤時。枕畔猶攤書。仲每過候。公必強起對奕。  
長君跪請不爲止。臨歿。儵然而逝。子二。皆俊爽豪士。  
而長君尤見重于大人先生。孫二。婚娶皆名族。人以  
公孝友傳家之報云。



張聖清傳

張聖清諱積源。上海龍華人。按察使七澤公之仲子也。君生秀慧。弱不勝衣。十齡誦詩騷。十二嫻經術。神阿熊令君。淇園楊侍御。試而器之。補諸生高等。舉體無凡。寄情不近。望見者如鷗拳秋水。鶴唳寥天。莫得喻其意也。七澤公以秋官出守姑茂。尋憲粵西。壬子入賀。挈君北行。俾游國學。以便往來省覲。母徐淑人。患中滿。君稱藥量水。搯色聽聲。惟恐跬步離左右。禱醫得虎頭人語。躬延顧叟。三劑而瘳。禮諸伯叔如父。



撫季弟孤侄。矚如良友。巧如導師。見緇素負隱匿。不  
急爲噍讓。涕泣引諫。密所改絃。七澤公廉于官。君鮮  
餘鏗。客有以緩急告者。以法書名畫售者。強半質貸  
應之。否則惘常累日。性度淹雅。能與物無忤。而德矩  
湛然。絕不見縱情誕節。亦不聞以雌黃堅白鳴。至于  
謁長吏。游大人。華裾細馬。追無逐走于少年之場。君  
非特堅塞耳輪。且不欲安之眉睫上矣。嘗借余手批  
南北史。爲丹鉛塗乙。不輕放一字。其他摘錄異書。不  
勝紀。構竹安齋。又構兩隱軒。因詠雨中三友。詠閒中  
好。其詩清真娟秀。倣陶白。詞亦不減柳七娘。規造一  
舟。名自在天。凡釣竿詩卷。薰籠隱囊。以至壘洗管絃  
之屬畢具。客至。命酌清酒一觴。枯碁一局。醉則命侍  
兒。迦陵弄新聲。君按牙以紫簫和之。渺渺度烟際。而  
去。七澤公有小舟。曰載石。父子常相尾出游。而君獨  
時時入東。余訪余。揚檢典墳。討論桂木。申旦徹夜。彼  
我忘疲。辛酉適越。次皂林。遇舟子爭道。篙穿君頰。旁  
墮二齒。君嘆曰。此宿業。勿創之。投謁雲棲塔。受殺戒。  
過十八澗。買瘦藤。磊砢多奇數。之正得十八節。遂名



杖爲十八澗。挾此復游草蕩中央。夾山漾而歸。時七澤公移家龍華故里。君築室三楹。嚴事旃檀古先生像。一似浮圖法。俄匝歲。困肺疾。嗽嗑嗑。喘不續。呼迦陵宛轉抱掖者百端。請代請殉。君不起。歿于樂無知齋中。有遺令曰。肯休錄錄云。擇僭勿太急。立後勿太早。經營兩親壽藏。勿太遲。家產半贍宗人。半作善事。生平玩好。分贈親知。而笠杖杯筯。則以遺眉道人爲訣。眉道人捧次。哭失聲。兒曹驚怪。數年來不彈此泪久矣。嗚呼。痛哉。君事七澤公。有至行。又有苦心。藁耻

而不使見窘容。神憊而不使見病態。情深而不使見悼亡詩。一痛也。跣跋名場。三戰三北。雖瓦注功名。而微抱牛衣貂裘之感。二痛也。詩文吾見其進。未見其止。不噉名。不市交。推重于吾曹。而遺賞于通都大邑。三痛也。中郎有女。伯道無兒。四痛也。聞廣寧破。岸幘絞衣。彎弧學射于山下。氣吞并州健俠兒。而不意命脆蛛絲。蛻同蝟甲。五痛也。君嘗戲謂我洞曉聲律。類戴顓。若遇宋文。當給聲伎一部。好鼓柷垂綸。類張志和。若遇唐玄宗。當賜樵青釣童。今釣童無恙。而樵青



化爲彩雲。隨風颺去。吾豈復有意人世哉。君益指白  
下姬。幽妍也。幽妍予別有傳。傳成書一通。并焚君柩  
前諾。乃載拜三酌酒。洒泣而後行。

附

書陳穉登交情始末

無錫陳穉登之亾也。栢潭孫公涇陽顧公狀而志之。  
而唐元徵董玄宰王辰玉皆各爲之傳。其子藝之又  
以穉登遺書訣余。余更白練衣爲位而拜啓其書。淚  
浹于睫而不能讀也。嗚呼痛哉。初穉登入南雍。新都  
許相國爲祭酒。新建張相國爲司業。一時所賞識。傾  
天下知名之士。而獨愛重穉登。與吾亡友徐長孺。長  
孺歸而謂余。南中有大儒。及奇男子各一人。則武進



徐傲絃涇上陳穉登也。徐公名宿。顧心降穉登。蓋其人豪似元龍。俠似孟公。推倒一世。似同父。余退而私志之。甲申。穉登走華亭。訪余。余方與辰玉讀書婁水。而穉登亦欲謁文于弇洲太原兩王家。至是始相遇。甚得。別去。己丑。余與徐長孺會葬于顧墓。因訪穉登。穉登出子弟見余。流連日夜。錠門不得歸。迫余賦詩。又屬余撰祠堂記。因導入祠中。掃除靚潔。肅如官府。曰。不肖歲時饋奠。吾婦手浣錡釜而進之。一夕婦不戒于鼠。而不肖禮必以昧爽上食。婦倉卒不能辦。爲

易他饌。不肖爾時當神主前。不可以誚讓婦。伏地責無狀。哭不起。吾婦聞之。懼。幾若無以自容者。累日。既而出饌。饌余甚旨而整。及余童子行。則間雜酒脯。枯魚麥飯以佐之。余以是心知談孺人賢。又知穉登之恭儉而有禮。能行于妻子也。自後與穉登不數見。歲以書往來。而一日雨中薄暮。跡余于秀州之南園。余門生皆以得見穉登爲快。穉登方從北雍下第歸。俯仰黯黯。旣而爇燭進酒。忽岸然謂余曰。我北游無所遇。顧喜見李如松大將軍。霍霍膽畧。有名將風。顧叔



時爲文選恂恂如書生。閉門清緊不通針芥。顧益卿  
司馬時時以酒錢寄我。我得緩急人。且使者言遼陽  
黃鬚兒。皆折箭相戒。不敢犯塞上。是皆長安中可喜  
事。其餘馬蹄碌碌。惟有埋人十丈塵耳。穉登時已大  
醉。復命浴。科頭坐。余榻間。滾滾論文史。旁策國事。反  
覆及夜半。皆可喜。至明日。邀余送之十里外。雨蓬之  
下。探詩艸奏余。一讀一笑。鬚眉奮張。臨別復邀余贈  
一歌。乃釋。此乙未八月十六日也。嗚呼。孰意此日。乃  
與穉登訣耶。穉登長余七歲。余多病。穉登壯旺有精

魄。尚未衰。余見人退縮。而穉登賓至如歸。以穉登之  
年。與才心。敵志得。與當世將相。及四方文章豪士。酣  
嬉淋漓。何所不樹立。而落落卒不遇以死。其死又僅  
四十有九。是可惜也。穉登忠直孝友。能信于里族。里  
族無大小。不之官府而之穉登。一言以爲解。生平視  
交情最真。其待王崑崙先生。始終執世講子侄禮。最  
謹。顧司馬嘗折柬崑崙。招爲薊門游。崑崙行別。穉登  
置酒送之。已復念其老。不任遠道。爲掩抑泣下。崑崙  
卽時慷慨罷裝。顧司馬以不能致崑崙也。乃馳百金



爲王先生壽。天下聞而咸高之。今春崑崙以穉登病告。余以爲卽病不必死。未幾哭穉登訃矣。又未幾且哭王先生柩矣。張新建已解相印去。顧司馬與涇陽兄弟皆歸臥矣。李大將軍戰沒矣。曩與君南雍同游者。如倣絃長孺皆先亡。卽許相國墓頭之艸黃且隕者。又不知凡幾歲矣。大抵人生如奕棋。遞生遞死。遞合遞離。此無足怪。然必局終而後國手乃見。今下子方酣半道而撤。非獨奕者負恨。卽旁觀亦爲之嘆息不已。嗟乎穉登。豈特余一人區區知己之痛而已哉。

幸而可以不朽。吾穉登者。有諸君子之志狀表傳在。余特記其交道之始末。以示吾兩家子孫。各有考焉。

眉公先生晚香堂小品卷之十七終



眉公先生晚香堂小品卷之十八

雲間陳繼儒著

傳

貞懿吳母傳

吳伯霖治經稱社祭酒。別十年餘。而余與之遇。索笑軒。班坐堤上。日暮風起。白楊蕭蕭。伯霖不語。而意自慷慨。余心知其非經生也。今年乙未。余經所見爲壽。吳母詩若歌者衆。問之。皆曰伯霖有母。母之六十也。子女洗酌甚懽。而母忽嗚嗚咽者三。亟命懸中州公



像具觴豆。先薦而後嘗之。賓客聞且見者。以爲知禮。獨伯霖心動。不敢言。未幾。慶者舍而唁者途矣。孺人孫氏。錢塘江滸古塘公之長女。中州吳公之配也。孺人幼工書筭。喜讀史。間出臆語。課成敗。多中。治家恭儉明慧。上下以諧。六年。遘內外之喪。產漸訕。遂與中州公如華亭。消息數年。飽其橐而歸。歸有中州公之寡嫂。公故母視者也。迎養之。其三歲孤。故子視者也。擇同生姊之子妻之。至是。夫婦始相顧。退息爲菟裘計。老矣。而中州公視前。亦日閒以止。客以壽公。公笑。

曰。余之病而從方外游也。孺人爲治山中裝。歷三載。始克復有生。生而間關拮据。又歷十五載。轉徙吳越之間。始克復有家。若是者。正惟吾婦之賢。孺人聞而委蛇謝曰。嘻。婦職耳。此何足以侈君。君不見堦前十歲兒乎。能讀史記漢書左氏傳矣。夫人行過而禮之。且有問吳氏子。引爲小友者矣。伯霖既有聞于當世。車騎填戶。孺人輒從屏幃間密矚之。客滾滾覺豪雋言可聽者。未嘗不剪燈市酒。盡其議論而去。伯霖數上公車報罷。還伏牀下。謝無所逃責。孺人第緩拂纓。



上塵慰勞數四。色加怡。伯霖出多長者游。入則反面以盡釋其峭岸不平之氣。則孺人以也。孺人事繼母如父。中州公嘗三拾遺金。三返亡者。孺人往往輔以贊嘆。喜動眉睫。是皆人情所難。沒之日。其子之友及門人賢而思之。謚曰貞懿。嗚呼。婦人不稱謚。謚孺人者。以其能爲人母也。雖然。伯霖非經生也。子伯霖足母矣。奚其謚。

陳子曰。吾聞諸人。驅車至越。而不識伯霖。不名游也。游伯霖而不拜其母。不名伯霖客也。余交伯霖十五年矣。母六十不果觴。今及葬。而始以伯霖之請。許之傳。夫傳弗可已也。則謚弗可已也。于是合而傳之曰。貞懿吳母云。



李母楊節婦傳

節婦楊氏。青浦縣學生員李光初之配也。其父爲中丞朋石公。祖細林公。稱名族。少嫻于女憲。甚有德音。十八歸李君。性剛介。言笑不苟。妯娌莊憚之。啁李君曰。新婦不曉事。盍置副。李君不爲動。讀書山寺中。風雨。蠶鹽。晏如也。戊戌。應督學使試。感寒歸。楊氏初舉兒。投兒李君懷。而身則力疾藥裏間。搯色聽聲。露禱請代。李君竟不起。楊氏號踊治喪。陰挾利刃。欲自殺。遮止之不得。忽斷一指。投棺中。哭仆地。是時孤兒才



二十六日熟睡老嫗衣衽間。嫗驚怖頓足長號。兒墜地。賴寡姑急抱之。得活。食頃。楊氏始甦。已亥葬李君于青浦故隴。奇寒裂膚。指斷處猶痛不可忍。無何。子女病痘瘍。楊氏裹血挫針。佐醫禱費。居恒屏跡一室。隣童村姆。汲漿索火。未嘗望見顏面。惟爲孤兒求智。慧。禮。觀。音。文。爲。求。延。生。禮。諸。經。懺。其。它。巫。覡。見。鬼。人。等。不。敢。闖。入。門。限。一。步。地。孤。兒。五。歲。喪。祖。屢。勉。喪。禮。已。爲。宗。長。漁。其。產。垂。盡。楊。氏。負。孤。兒。對。簿。哭。而。過。市。謁。訟。庭。縣。大。夫。憐。之。事。得。解。而。貧。愈。甚。勅。孤。兒。出。就。

塾。余。見。之。李。先。生。坐。隅。賞。其。奇。穎。遂。以。女。字。之。稍。長。從。游。于。泖。濱。海。畔。楊。氏。憂。虞。萬。端。淚。從。腹。中。落。戊。申。歲。惡。孤。兒。臥。篤。疾。楊。氏。營。護。始。得。瘥。與。幼。女。刺。繡。買。米。飯。兒。嘗。絕。粒。檢。得。敝。枕。中。菘。豆。升。許。煮。糜。旋。不。忍。下。咽。而。止。已。酉。嫁。女。丙。辰。孤。兒。娶。余。女。而。楊。氏。逝。久。矣。初。已。酉。除。夕。楊。氏。色。慘。然。嘆。曰。未。省。明。年。此。夕。在。何。地。庚。戌。歲。朝。受。孤。兒。拜。訖。出。素。履。一。鞞。授。之。曰。未。亡。人。將。赴。十。二。年。前。舊。盟。矣。孤。兒。心。悸。不。自。持。亟。奔。告。寡。姑。邀。女。兄。弟。競。相。勸。慰。楊。氏。執。孤。兒。手。曰。誓。不。



食明年新。我志已決。至八月。孤兒生月也。絕粒死。嗚呼。竒哉。孤兒名大節。績學能文章。郡侯陶公。邑侯章公。鮑公。學師熊公。嘗拔置第一。士論傳寫其文。以爲楊氏植孤之報。目前雖未遇。其志意卓犖。望而知爲鐵石竒男子也。夫臣殉君。婦殉夫。等節耳。然爲忠臣托孤易。爲節婦保孤難。彼其仗威靈。揭名號。收拾四方英雋。豪傑。以爲忠義倡。而楊氏以孱婦抱孤兒。寒幙殘燈。之與俱。畸形單影。之與侶。斷指于十三年前。絕粒于十三年後。蓋女中之龍逢。比干。伯夷。叔齊也。

若其保孤而孤立。則又加于忠臣一等矣。李之先有鍵齋翁。割心救母。操刀小廟中。血濺佛座下。世稱爲李孝子。惜不載青浦志。而楊氏之竒節。復使之泯泯無聞。非惟得罪于名教。且得罪于鬼神。余故作傳一通。藏之山中。采風者。表墓旌廬。或亦有徵于斯焉。



錢母陸淑人傳

陸淑人者。誥贈中大夫。山東右叅政。忠所錢公之配。宮允抑之。方伯康侯之母也。錢氏出表忠裔。元有修職郎國馮者。自臨安領嘉興侯。因家焉。尋析爲嘉善人。四傳爲邑廩生世華。其子萼。精于醫。纂醫海二百卷。萼生昞。昞生貞。是曰栢峯公。中嘉靖丁酉鄉試。令尤溪。歷楊州汝寧二守。以廉吏稱。栢峯生心亭公。吾仁。入太學。贈叅政。娶曹。贈淑人。舉二丈夫子。長卽贈公。贈公自少醇謹。卓然以儀軌自居。及長議



婚得長汀丞陸公女。十五來歸。保母趙媪。睨而嘆曰。新婦神明意審。矯矯適上。異日祿幢褕翟中人也。旣廟見。出朝尊章。調御上下。逡巡皆有方局。宗人不敢以年少目之矣。初裝遣廉薄。已叔姒盛孺人入門。紈綺相照。環珮之聲。璆然。淑人處之晏如。盛產兒。外家具文祿錦褙。犀錢玉菓相屬。而淑人舉子。但率女奴治泉。以供湯餅客而已。然淑人待盛無間言。每事推掖之。使前調護甚力。贈公當析箸。採策得西第。輪奐方新。堅以遜其仲。而自處故居。稍稍漸理堂構。經營部署。悉出淑人手中。卽心亭翁嘗許葺治費。不忍索也。旣居別宅。去曹太君僅百武。淑人起居不離側。老嫗小奚遣餉。趾相錯。數偵其所餐。加損爲憂喜。太君常謬爲勇噉。以慰之。心亭翁病膈。贈公與淑人承響床第間。侍疾不解帶。治喪不勝衣。諱日生辰。饋奠飲泣。卽推及王舅姑。率子姓跪拜如禮。潔齋謹恪。說者謂其有詩禮薦浣采蘋之風。贈公性弘恕。不喜苛察。園丁有竊瓜者。家人有乘火攫金去而娶婦者。悉貫勿問。反好語囑之曰。無爲主母所知。而淑人則治家



嗃嗃。男女不比肩。寢興不失度。賞罰不僭約。卽夜半猶秉燭省視曰。雞鶩逸乎。犬飯乎。門牝闔乎。灶突燿火不息乎。則又呼其子而質之曰。而渴欲茗乎。而餒欲餅餌乎。而寒欲加衿乎。如是數四。乃卽安。贈公遇荒施賑。遇疾施藥。衣食無告之人。瘞埋無主之骨。峻却祖姑比隣之產。贖史生鬻兒。撫任氏一門疫厲。沒而經紀其喪。人以告之。淑人。淑人贊嘆從臾。惟力是視。不忍以拮据織嗇謝也。贈公嘗笑曰。家乘有健婦。書種有佳兒。豈復裏縫掖。埋沒枯螢老蠹中哉。遂謝

去公車。日以課子爲事。手錄古人格言警語。榜之屏障間。諄諄以忠孝廉節相勸勉。淑人更以方嚴佐之。未辨色。蹴使興。燭垂跋。趣再讀。鏟落浮華。封鄣混沌。凡一切大人游。少年場。以及詩壇酒政之豪舉。非唯不使近。且不習也。文社有會。贈公拈題危坐。淑人走爨下。張具。繼以然膏。未嘗敢告饒。賢師友過從。爲咄嗟立辦。皆豐腆。而約束二子。不過數臠肉。三浣衣。稍請更易。瞪目怒不許曰。孺子輩。乃敢快意耶。康侯癸丑成進士。抑之登丙辰殿試第一。賀者傾城。涸巷來



觀淑人痛贈公不及見也。謝客拒筐篚。間有趨羶附  
熱者。禁勅勿與通。曰。先君子嚴義利。謹取予。處後守  
雌。素風如昔。若導之。關說長吏。漁獵細民。吾家兒羞  
而不忍爲也。嘗語仲子曰。汝司寇。無以三尺法。笞人  
于丹書。語伯子曰。汝史氏。無以七寸管。蟻人于青史。  
二子退而識之。康侯欽恤三輔。多所平反。抑之修  
神廟實錄。不輕置衮鉞一字。翳惟淑人有紳訓焉。贈  
公玉立白哲。方頤豐下。與人交。溫洽詳緩。觸之不怒。  
挑之不爭。不乘急減值。不小惠市名。客有負債者。歸

其券。有負心者。則俛而笑曰。此宿世事也。笑而貸之。  
邑大夫謝公。嚴以老更之禮。一往輒不赴。栽梧種菊。  
顏其堂曰清鑒。更自號閒棲居士。日與仲弟衛幕公  
出入飲食。必與俱。怡怡如也。淑人待外家。無私假私  
與。待兩婦。無左袒右袒。質明而起。操作如壯時。勸之  
盍少休。嘆曰。惟懷與安。實敗名。季文子之母。樂羊子  
之妻。何人哉。晚年戒殺。好竺乾先生之言。彌留時。命  
眷屬環念大悲觀音者數千聲。氣體香潔。柔和如生。  
雖不學佛。故是學佛作家。然巫覡師尼。及見鬼人等。



則門庭削跡矣。抑之名士升。康侯名士晉。海內號稱兩錢。比于眉山二蘇。金華二陸云。

陳子曰。贈公戊申前逝。淑人優游祿養。幾十五年。抑之康侯。似可少釋。終天之憾。而語次輒泣。不自勝。曰。吾于兩親。有至痛。先公手抄六籍。百家言。授以句讀。若望以名世。而不聞兩兒。南宮報。一痛也。臚傳首選。遠近識一面者。皆爲額手。而淑人追念先公。反爲之喜極而悲。歛噓罷飲。一痛也。兄弟晝遊京輦。擬以板輿迎母來。重去家不可強。一痛也。士升艱子。淑人禱

襖以祈多男。今舉兩雄。長者娶婦。裹青襟。次者讀書。已上口矣。而母與先公。曾否對笑地下乎。一痛也。弟代北門守。兄乞南陔養。而晉有疆場之役。母大憂。已觸璫燄。幾巨淵。母聞之。又大怖。一痛也。今

主聖清時。禍本頓拔。兩兄弟方將式歌且舞。以薦膝前。太平之觴。而母不我待。一痛也。六痛填膺。九原誰告。所恃以不朽吾親者。在志表傳。朱少師錢宗伯。業已憐而許之矣。兩公袞而史。子布衣而史。敢稽首載拜以請。是故陳子不辭爲之傳。



劉母錢淑人傳

淑人海鹽錢永州芹之女。按察使劉公烜之元配也。錢氏自臨江公以來。纍燕簪紱。多清人賢胄。永州公與劉太公朮同舉于鄉。嫗甚相約爲婚姻。劉太公爲威縣令七年。裝不滿四十金。旣捐館。益中衰。按察公從永州公受書。永州公貴時。羣從兄弟。後先成進士。諸姻姪綺紈駢坐。按察公獨否否。永州公出繒綵授之。謝不內。而衣布衣。蹶躄如故。左右多鄉背有輕心。臨江公聞而歎曰。劉郎貧而才。又廉吏兒。少年不成。



名。吾不復相天下士矣。淑人十七歸按察公。晨朝鄭太君。太君目逆之。儀軌自如。以次委蛇起居。諸姊妹人人解頤贊賀。得婦賢。鄭太君性嚴重。造次必依禮法。少忤輒加詈罰。每病熾。昏瞽干嘔。頭眩不得怡。淑人率袒衣。膚裏相屬。掖臥起。跬步不離側。旦晚上食。無敢平面視中。褻以下手自澣之。鄭太君心動。爲解嚴曰。新婦善事我。按察公官金谿。官留都。官臨川。皆與淑人俱。官閩粵。官黔。更官豫章。淑人奉太君于家。當龍頭寨。諸盜起。福寧曾一本起。廣中。公在事。轉餉督兵甚棘。太君憂之。食不甘。淑人曰。吾矚其生平。蹇進而好退。多讓而寡營。蓋恭儉吉德人也。卽置虎穴中。無死法。况其才足辦賊者。未幾果奏捷。捷書首推穀公。公遜績不居。卒如淑人所料云。按察公居官廉。淑人扁牙署。日課童婢種蔬績麻。尺寸不外素。司帑吏啗公羨金八千餘。公籍錄爲公家經費。嶺南之役。明珠異香。不點歸橐。曰。少染指。恐爲吾婦錢。淑人所笑。家居門風醇淡。賓祭以外宰。聞庖聲。淑人每與公對案下食。藿肉漿酒。取給輒止。餘則分甘旁媵。亦不



復少有異同。寢室中木榻絺帷。卽按察公亦十年布被而已。此淑人贊之也。太君春秋高。淑人亦肩差稱老。及奉諱。悃悼痛哭不勝喪。每細事動稱先姑。縷引遺令以勅諸子。子五人。其爲淑人出者。進士世埏。太學世坊。孝廉世教。而埏坊皆前天。淑人哺其孤雛。成佳士。當淑人在堂。子孫無敢衣錦見者。及歿。各受室。始稍稍更故時衣。子孫每相見輒頰首曰。吾甚愧淑人。吾甚愧淑人。淑人從官歸。嘗舟次沈氏里。其妹沈宜人除舍迎之。女從皆更裝。候矚屏幕間。有頃。綦縞入門。單率如窶婦。問之卽劉家錢淑人也。僕御熟視。揜口笑。怪其疎質。而沈宜人憮然歎息。以爲不如。故傳者盡稱劉氏家法。爲遠近鄉里之冠。淑人初以按察公。南京工部主事。封安人。晚以伯子埏。南京刑部主事。覃恩復從公階。進今封。

陳子曰。吾讀孝廉之狀。按察公也。其庾信鮑照之流乎。若淑人狀。則龍門史也。江東之家。修衷輕袿。薰香洗濯。此不起單族。而起于豪門。又不起有檢之縉紳。而起于一二無識之女子。司世道者。心竊憂之。有如



淑人恭儉而有禮。豈非劉氏之女宗母師哉。劉向范曄傳列女。凡閭行皆得書。而後世非刑耳斷髮之流。不編名于史氏。則黔婁柳下惠之妻何人哉。此余所以有感。而爲錢淑人傳也。

附外傳

唐李公子傳 并序

余下第歸。抱幽憂之疾。以道書淘汰之。心猛氣深。強抑不下。乃搜讀稗官家得李公子傳。唐書有言鄴侯之子繁。不甚賢。今公子頗有奇韻。想繁之兄弟行也。但不知爲鄴侯第幾子耳。錄之左方。

李公子者。父泌爲唐鄴侯。侯旣老。謝事辟穀。公子官襲侯封。不願侯。願詞賦科。時肅宗新復兩京。以兩京



賦試進士。御泰清殿親臨之。公子立就萬言。未嘗加  
點。賦上。上方午饜。太常作樂。命輟樂讀之。愛其美也。  
袖入宮中。擢第一。人勒石刻兩京賦于殿前。公子方  
十九。眉目清映。紫衣白馬。宛如神仙。上一見大喜。謂  
侍臣曰。鄴侯宣勞。再造邦家。曾不肯剖粒自飽。今其  
子雖不願侯。授官宜與侯等。以集賢學士授之。公子  
謝曰。臣實不敢當此。但乞告身一。通便宜山水間。縣  
伯不得追呼足矣。上嘉其志。御寫勅札。并賜宮嬪兩  
人。曰。一以掌書。一以煖酒。郭汾陽有女曰清明。君者。

有殊色。喜讀離騷古陶謝詩。嘗刪詩去其鄭衛者。手  
錄一卷。日日批註。閨房中以小室廟祀舜二妃。配饗  
以魯共伯之母黔婁之妻。春秋祭之以文。其高閒如  
此。汾陽王難其配。以李兩京賦視之。清明君慨然嘆  
息曰。可矣。旣歸李。李年少謔浪。醉時微以謔語侵清  
明。君不悅。見其謝過。乃笑曰。妾之天性。栖栖藝文。固  
其所長。若欲濡首酒杯。從公嘖笑。間乞煖熱。所謂邊  
豆之事。則有司存。無已。願以黃金千斤。爲公子置妾  
數百。以任恣討。汾陽王聞之也。遣人分馳四方。四方



有奇女子。以詩名顯者。搜訪殆盡。而其中曰纖纖。曰白娟。曰鷺翹。曰春萸。曰紅草。曰暈兒。曰綠絲。曰碎桃。皆骨柔氣清。熟於古文奇字。而纖纖善箏。白娟善歌。春萸善鑿古器。善笙。紅草善彈鳥。善鼓琴。暈兒善嘯。綠絲碎桃善種花。花經二人手無不活。又善騎馬。鷺翹善丹青。善舞。公子樂之以酒。酒必以詩。詩成。諸美人起而和歌。歌無襍聲。其地修竹清泉。細簾嘉樹。月出之時。鳥啼絃亂。相與牽衣抱袖。紅白低迷。起視草頭蕉葉之上。大都墨漬酒痕而已。清明君無問晴雨。

每候山果新熟。則遣美人捧進公子。或書史有奇事。可讀者。以綵線識之。則遣捧進公子。或成新篇。或偶得一二佳句。不忍獨賞。則遣捧進公子。故美人人人得親公子也。而清明君當其酒半。嘗乘紫帷小車臨焉。公子率纖纖以下。短謳長飲。彈箏鼓瑟。次第上壽。酒已。則各以平日所賦詩獻清明君。焚香緩坐。細加品題。稍不安者。爲改點數字。每點一字。輒以一觴罰公子。曰君老於詩者也。不爲美人更之。乃含糊作影子過耶。是必容香火情。美人皆笑曰善。誠如夫人言。



是宜罰。如此者連罰數觴。公子竟醉矣。公子嘗游于蘓州。時有新進士選名妓百人。浮於荷花蕩中。衆進士本措大骨相。驟得此。足高志揚。畢露醜態。公子更布衣坐小舟。往來覷之。有進士呼曰。是小船中秀才何爲者。汝能飲酒乎。曰能。能賦詩乎。曰能。曰若是。汝且過我。公子岸然據其上座。執酒卮。睽視雲霄。不爲禮。衆進士以爲狂生也。俟其酒乾。欲以詩困之。及分韻。公子謝不能。曰。頃固以謾語誑君一杯酒耳。實不曉詩爲何物。衆進士顧諸妓大笑曰。吾故料狂奴未必諳此。吾輩且自作詩。詩許久。沉吟不成一語。語出又村鄙可笑者。乃手舞足蹈。互相傳示。嘆賞不已。已而悉出金玉寶器。以陳富貴耳。語諸妓曰。是秀才曾見此否。傍有一黃衣妓者。秀質楚楚。愁態萬端。公子叩之曰。吾觀汝。一似有憂者。汝有心事可訴我。我爲汝料理不難。一進士掀髯大言曰。汝欲了此君心事。但恐酸秀才正自不堪。是嘗負我千金。分毫無所償。今見我。不覺斂容耳。公子笑曰。此細事。何足憂。於是衆進士又夫笑。轉以爲狂生也。頃之。公子之樓舫適



至鼓吹大作。公子呼進士與各妓過船。羅列食器。酒  
罍皆以五色寶玉。明珠翡翠。雕鏤裝綴之。奇麗特甚。  
公子見之斥曰。何乃陳此俗物。亟撤去。悉付黃衣娘  
子。今日一段心事。爲汝結證了也。已命更席。則陶觴  
瓦鼎。無非三代物。最近者亦秦漢銅器。隔簾女伴。隱  
隱作樂。曲譜俱內調。及公子新詩。人間無聞者。進士  
目視不敢問。使各妓拜而請詩。欲因詩尾得公子姓  
名。已知其爲公子也。皆紛紛向前奪詩。公子令曰。汝  
輩且置酒于此。若酒冷而詩不成者。罰我。詩成而酒

熱者。罰汝。往往酒未及溫。已搖筆滿紙矣。紙盡無可  
奈何。乃裂帛絹。絹盡則裂帷幕屏褥之類。又盡則各  
剪裙葉。或絕長袖以進。所得片言隻字。如獲奇寶。貼  
身藏之。衆進士誘之以酒。酩酊多半竊去。妓有啼者。  
公子以爲可憐也。公子起立。作樂女伴。乘間說之曰。  
汝輩盡肯落籍從公子游乎。有別院在湖山之上。門  
前朱樓一帶。覆以垂楊。松篁中粉廊紅榭。高臺短橋。  
宜雪宜月。四面遶以梅花五六十里。深秋之際。則林  
楓萬株。擁若霞氣。楓樹間有高樓。翼以堂廡。其正中



以奉藏經。其兩旁以貯古今異書。左有酒庫。凡天下名酒無不藏。右有泉庫。凡天下名泉無不具。若此者可以休汝矣。諸妓唯唯。乃盡從公子歸。公子悉召酒人。劍客。高僧。道士。曉夜酣歌。沉浮此中。賦詩之暇。非細談釋部。則酬論兵符。燭盡酒空。醉而後已。賓客既散。時與綠絲碎桃。高裝駿馬。踏入深山中。過平原易地。着鞭奪路。拋閃如飛。樹叢邊聽山鳥聲。則命紅草彈鳥。偶不中。皆拍手笑。浮以半觴。轉入幽險處。美人車不得度。攀蘿挽石。欲上欲下。笑哭襍出。忽到荒岡。

崇嶺之上。天風四來。暈兒清嘯一聲。水葉亂舞。裙裾飄脫。步立不定。公子懼其傷也。乃徐返馬。天下聞公子名。飢寒之士輻輳來集。候其將歸。皆匍伏道左。叩頭大呼曰。非公子無以活我。公子轉盼間。賞勞都徧。日費千金。無幾微顏色。一日就中忽有執公子衣者。曰。願辟人。臣有所言。公子不憶於陵時乎。汝所謂於陳仲子者也。上帝憐汝貞苦。故今日置汝李家。涉獵世味。清明君卽向時辟纊夫人耳。夫日之光有短長。月之魄有死生。人之福有往還。公子宜早決。且汝



父鄴侯。及婦翁汾陽王。皆爲清微天帝君。待女夫婦  
來久矣。言訖不見。公子大悟。以家產萬億計悉散之。  
與清明君入洞庭石公山修道。不知所終。後陸贄之  
華亭。常見公子往來三泖中。

范牧之外傳

余宅隣牧之。少聞牧之以情死。不敢問父老。比十年  
奉化人之教。畧已定情。乃始許牧之子必宣。作牧之  
傳。范生牧之。名允謙。伯父太僕。父光祿。爲文正忠宣  
公後。牧之復以庚午舉鄉進士。生而頤廣額。頤頰而  
下小削。目瞳清瑩。骨爽氣俊。不甘處俗。華亭世家子。  
出必鮮怒。錦衣狐裘。舞于車上。童子駢肩而隨。簪玉  
膏沐。如婦女之麗。牧之見之。往往內媿肉動。毛孔蝟  
張。輒障面去。牧之居恒單衫白裕。着平頭弁。與諸少



年頡頏而游。游遇豪貴人。牧之欠抑唯諾。陽嘆不敢言。衆以爲是生也。寒酸不上人眼。意輕之。牧之乃快。或坐客小覺。則拂衣疾趨出。急遣追呼者。問牧之。牧之飄風逝矣。性嗜書。無所不讀。能跳梁于翰墨間。有才子之志。客非韻。斥門者不納。納必以名香清酒爲供。或宴語夜央。喜不嗜寐。童子更燭割炙。復張具如客初至時。屋下雞鳴。猶聞鼓琴落子聲。及醉而嘯者。至是四方之客日益集。牧之恢張心胸。厚往薄來。故雜賓亦稍稍得進。而未幾杜生之事起。杜生者。妓女也。以風態擅名。慷慨言笑。自題女俠。與牧之一遇于閨門。目成久之。退而執手嘆曰。吾兩人得死所矣。君勝情拔俗。余亦俠氣籠霄。他日枕骨而葬太湖之濱。誓令墓中紫炁射爲長虹。羞作溷渙女兒。下指鴛鴦。上陳雙鵠。言罷大泣。衆驚其不祥。嗣後淹繫旬月。無復顧禮。毀頓精神。廢輟家政。客乃有爲文告神以絕牧之者。牧之荅曰。僕聞虧名爲辱。虧形次之。諸君子俱當世賢者。僕雖不才。忝惠莊之遇。舊矣。諸君子一且攝齊束帶。矢之神前。擊鐘伐鼓。以絕鄙人。一時觀



者莫不駭遽狂走。謂僕當得夷族之禍。以至于此。甚而造作端末。飛流短章。筆之隄糜。付之尸祝。無煩檢考。遽定爰書。不須左驗。遂成文案。是忠告之義。同于擿舛。楛撫之過。近于文致。使僕不能含生于覆載。強息于人世。辱云甚矣。僕亦何人。其能甘之。唯有蹈東海而死耳。牧之既深情膠粘不解。而復爲諸客所激。若圓石遇坂。轉觸轉下。勢不得不與俱盡。會太守窘杜生出。辱之庭。牧之忍愧。以身左右翼。多悲辭。太守徘徊。不令下鞭。然終不許牧之以一妓女。燼黜賣杜。

爲賈婦。牧之佯諾。陰使人贖爲山西賈。得之以藏于別第。俄載而與俱。長安居長安邸。不三月。牧之病肺。歿。牧之既死。杜生勅家人。裝治其喪歸。而以身從。杜入舟。忽忽微嘆。間雜吟笑。如無意。償范者。至江。心命浴。浴罷更衣。左手提牧之宣和硯。右手提碁楸。一躍入水。左右驚視。不能救。初見髮二三尺許。沉浮旋瀾中。已復颺起。紫衣裾半摺。復轉睫間。而生杳然沒矣。余聞牧之事。光祿公秦淑人。及遇弟允臨。斤斤孝友名。教人也。因緣爲祟。卒耗俊姬。何哉。漢高項羽。英雄



絕世。劔鋒淬人眼。不為貶。乃心銷神枯。終不能斷虞  
 戚之愛。夫二公賴有此舉。小足破俗。不然。項乃倔強  
 老卒。龍準公。一府亭翁。故態耳。語云。天下有心人。盡  
 解相思。死。世無真英雄。則不特不及情。亦不敢情也。  
 牧之者。得無老氏所謂勇于敢則殺者歟。定盟且誓。  
 永馬勿諼。沉恨幽疑。泮然渙釋。兩人可謂誠得死所  
 矣。使杜遲回獨生。或不欲生。而無幸以不汗病死。寥  
 寥千古。含怨何期。今而後知杜生之有以謝牧之也。  
 或曰。君家蠡首。倡風流。而唐杜牧之。奇宕挑達。半臥  
 粉黛中。以老。若于牧之。則諱姓。于蠡則諱名。垂二千  
 年。而合為范牧之也。嗚呼。然歟。否歟。  
 贊曰。余與牧之子。必宣遊。生駒俊鶻。抑何其似牧之  
 也。必宣入國。而遇平康里。則疾回其車。市有倚門而  
 挑者。恥若面黥。惟恐唾沫形影之及。必宣少孤。心不  
 能記牧之短長肥瘠。而能不失尺度如是。父豈必身  
 為教哉。夫曾子子父之相反。而趙括之讀父書也。為  
 人後者。其奚擇也。



楊幽妍別傳

幽妍小字勝兒。生母劉行一。在南院。負艷聲。早歲落籍。去嗣陳氏。陳之姨董四娘。挈往金閨。習吳語。遂善吳歛。董笑曰。是兒甫八歲。如小燕新鶯。不知誰家郎有福。死此雛手。陳歿。撫于楊媪。媪奇嚴。課書課綉。課彈碁。妙有夙解。不督而能。女兄弟多方狡獪。嘲弄詭侮。終不能勾其一粲也。庚申。楊媪避難吳越。載幽妍與俱。年已破瓜矣。薄幸難嫁。有心未逢。俯首叩膺。形于咏嘆。一日遇張聖清于秀林山之屯雲館。羣碎滿



前席糾無主。獨幽妍兀坐匡床。旁無轉矚。掠鬟舐油。笑而不言。私禱云。儂得耦此生。死可矣。張聖清者。才高筆雋。骨采神恬。造次將迎。綢繆熨帖。人莫覺其爲廉察使子也。舟中載圖史絃索。悉付小青衣排當。小青衣能射主人意中事。兼工竹肉。聖清曰。此西方迦陵鳥。以迦陵呼之。每攜入竹嶼花溪。遞作新弄。而最不喜平康狹邪之游。謂此輩正堪與鬪頭奴。大腹長鬣。賈相徵逐。豈容邪魔入我心腑。至是與幽妍目成者久之。明日遂合鏡于舟次焉。于時溽暑。晝則布席。

長林暮則移橈。別渚疎簾清簟。縈繞茶烟。翠管朱絃。淋漓酒氣。幽妍自謂十五歲以前。未嘗經此韻人韻事。卽聖清亦曰。世豈有閨中秀。林下風。具足如勝兒者乎。昵熟漸久。絕不角勁語。媒詞兩人交相憐。亦復交相重。曰。吾曩過秀州草庵外。聞老尼經聲。躍然抱出世之想。自慚絆縛。不能掣鞵奮飛。今昵君串珠纏臂。持戒精嚴。同心如蘭。願言倚玉。十年不死。請事空王。宿羽流螢。實聞斯語。聖清飲涕而謝之。七月應試。白。幽妍送別青溪。注盼捷音。屈指歸信。竝爾杳然。



及重九言旋而幽妍先驅渡江去矣。自此低迷憔悴。瘵疾轉深。腰減帶圍。骨見衣表。王修微謂余曰。吾生平不解相思病何許狀。亦不識張郎何許人。今見楊家兒大可憐。始知張郎能使人病。病者又能願爲張郎死。郎不顧立枯爲人腊矣。聖清聞之。遣急足往視。幽妍開緘捧藥。涕泗汎瀾。嫗克忍閉絕魚雁消息不通。幽妍典簪珥賂侍兒。屬桃葉渡閔老作字以達意焉。肩鏞斗室。不見一人。卽王孫貴游剝啄者。指刀繩自夫而已。媪卞怒竝甚。搥詈無人理。取死數四。救而復甦。不得已復載之東來。聖清偵狀。義不負心。有俠客徐內史。就中爲調人。彈壓悍嫗。無得故懸高價。殺此鐵石兒。媪唯唯。聖清乃納聘迎爲少婦。稽首廉察。公逡逡如女士。且覬宜男。勿詰責也。比入室病甚。猶強起薰香澣衣。劈箋滌硯。聖清手書唐人百絕句授之。讀皆上口。又雅能領畧大義。每環回離腸斷魂之句。掩抑不自勝。真解語花也。病中解脫了無怖容。佛號喃喃。手口頗相續。忽索鏡自照。不覺拍几慟哭曰。勝兒薄命。遂止于斯。又好言謂聖清曰。君自愛。切勿



過爲情痴。旁招訶笑。妾如有知。當轉男子身。以報君耳。又曰。妾命在呼吸。偃大人新宅不祥。盍移就郡醫療之。歲偪除夕。聖清歸侍椒觴。別去。幽妍悒悒。喘益促。侍兒問有何語。傳寄郎君。但瞪目槌胸。不復成聲矣。蓋壬戌臘月二十七日也。聖清奔入城。且號且含。襖延僧修懺。撤葷血者兼旬。雕刻紫檀主置座隅。或懷之出入衣袖。衾裯間。食寢必祝。祝必啼。啼曰。吾欲採不死藥。乞返魂香。起幽妍于地下而不可得。又欲金鑄之。絲綉之。倩畫師寫照百回。而未必肖也。何如。

徵傳眉人。爲逝者重開生面乎。余曰。傳且就。恐挑哀端。俟君病良已。乃敢出。而詎料君之終不及見也。幽妍墓在龍華里。聖清選地結茆龕祀文佛如來。償其始願。修竹老梅。環映左右。清芬涼影。颯如有人。畫眉郎散花女。其將比肩捉臂。踏歌而嬉于此乎。古有廬江吏華山畿。歐陽詹秦少游之義娼。糾結風緣。一慟而卒。初疑出于誕妄。今乃信爲果然。如幽妍聖清者。少判在鳳窠羣。鴛鴦牒中。豈死于情哉。死于數也。余不忍以介靜辭。爲作別傳。付子墨墨娥。相與流通。







